

voluntarie purgationis observantiam adimplerit, ut dictum est¹.

Ad tertium dicendum, quod legalia sacramenta non purgabant ab immunditia culpe, quod fit per gratiam, sed hanc purgationem præfigurabant. Purgabant autem purgatione quadam carnali ab immunditia irregularitatis cuiusdam; sicut in secunda parte dictum est². Neutram tamen immunditiam B. Virgo contraxerat, et ideo non indigebat purgari.

COMMENTARIUS.

1. Affirmat D. Thom. convenientissime id fecisse B. Virginem, non quod lege teneretur, sed ut filio in humilitate conformaretur. Ubi duo breviter observanda sunt: primo, cum D. Thomas dicit B. Virginem non fuisse obnoxiam legis observantiis, non esse intelligendum absolute et in universum; nulla est enim ratio ob quam dicamus B. Virginem omnino fuisse liberam, et exemptam ab omni legis obligatione, etiam post filii conceptionem et partum, quia nec ex dignitate matris Dei hoc necessario sequebatur, nec ad dignitatem Virginis pertinebat, nec speciali aliquam decentiam vel convenientiam habebat, præsertim cum lex illa esset divina, et omnibus generaliter esset proposita. Sensus ergo D. Thomæ est, decuisse B. Virginem implere legis observantias, etiam illas quibus revera non erat obnoxia, ut in hac cæremonia specialiter accidit, propter singularem rationem quam in solutione ad secundum explicat, scilicet, quia in ipsis verbis legis B. Virgo fuerat exempta; quam rationem statim fusius explicatur sumus.

2. Secundo, observandum est, quamvis D. Thomas prius solum dixerit, propter humilitatem debuisse Virginem legem purificationis servare, postea vero tacite tres alias causas insinuare, scilicet, ut obedientiæ exemplum præberet, ut approbaret legem, et ut calumniae occasionem tolleret; quæ omnes facile possunt ad unam humilitatem revocari; nam qui vere est humili, et perfecte obedit legi, et optime de illa sentit, ac sentire se ostendit, et potius vult existimari abjectus et impurus, quam scandalum fratribus, aut offendit occasionem tribuere.

¹ In corp. art.

² 4. 2, q. 101, a. 5, ad 5, 6, 7.

DISPUTATIO XVI,

In duas sectiones distributa.

DE CHRISTI PRÆSENTATIONE, ET VIRGINIS PURIFICATIONE.

Supponenda imprimis est fides historiæ, ex Luc. 2 cap. ubi sic habetur: *Et postquam impleti sunt dies purgationis ejus secundum legem Mosis, tulerunt illum in Jerusalem, ut sisterent eum Domino, etc.* Ex quibus verbis, adjunctis legibus Exod. 13, et Levit. 12, constat hoc factum esse quadragesimo die a nativitate Domini, ut ecclesiastica etiam traditio habet. Usque ad illum ergo diem permansit B. Virgo in Bethlehem; quid autem eo tempore, præsertim post adventum Magorum, factum fuerit, scriptum non est; sed uniuscujusque considerationi contemplationique relinquitur. Igitur, prætermisso illo tempore, ad declarandum mysterium præsentationis et purificationis accedimus.

SECTIO I.

Utrum debuerit B. Virgo Christum in templo præsentare ac redimere, et pro eo sacrificium offerre.

1. Principio præ oculis habenda sunt verba duarum legum, quæ ad mysterium præsens spectant. Prior est de primogenitis, Exod. 13: *Sacrifica mihi omne primogenitum, quod aperit vulvam in filiis Israel;* et infra: *Cumque introducerit te Dominus in terram Chananæi, sicut juravit tibi, et patribus tuis, et dederit tibi eam, separalis omne quod aperit vulvam Domino;* et infra: *Omne primogenitum hominis de filiis tuis pretio redimes.* Illud autem pretium quantum futurum esset explicatur Num. 18, illis verbis: *Redemptio erit post unum mensem siclis argenti quinque pondere sanctuarii.* Posterior, que ad omnes filios pertinebat, Lev. 12: *Mulier, si suscepto semine peperit masculum, immunda erit septem diebus, juxta dies separationis menstruæ, et die octavo circumcidetur infantulus; ipsa vero triginta tribus diebus manebit in sanguine purificationis suæ;* et infra: *Cumque expleti fuerint dies purificationis suæ pro filio, sive pro filia, deferet agnum anniculum in holocaustum, et pullum columbæ, sive turturum pro peccato;* et infra: *Quod si non invenerit manus ejus, nec potuerit offerre agnum, sumet duos turtures, vel duos pullos columbarum, unum in holocaustum, et alterum pro peccato, orabitque pro ea sacerdos, et sic mundabitur.*

offerri, et multis titulis ac rationibus fuisse convenientissimum. Primo enim hic applicari possunt rationes omnes quæ supra de circumcisione factæ sunt, quæ in præsenti mysterio quodammodo magis urgent, quia in eo nulla est umbra vel significatio peccati; sed potius ex illo intelligitur Christum esse verum hominem ex muliere procreatorem ac vere sanctum, quia statim ab initio Domino fuit consecratus et oblatus, quod in hoc mysterio specialiter significatum esse inquit Ambrosius, in Luc., in hunc modum: *Verbis legis promittebatur Virginis partus, et vere sanctus, quia immaculatus.* Quæ verba, et alia quæ ibi subjicit, tractavi supra disputatione de Virginitate. Deinde fuit hoc specialiter expediens, tum ut Christus omnibus modis sese pro nobis in sacrificium offerret; tum etiam ut non solum nos redimeret, sed etiam pro nobis redimeretur; primogenitus enim in templo oblatus non ibi manebat, sed pretio redimebatur, ut eodem c. 13 dicitur; illud autem pretium erant quinque sieli, Numerorum 18. Tum etiam ut statim ab infantia templum illud honoraret, et impleret prophetiam Aggæi 2: *Venit desideratus cunctis gentibus, et implebo domum istam gloria, dicit Dominus exercituum; magna erit gloria domus istius novissima, plusquam prima;* et illud Malach. 3: *Et statim veniet ad templum sanctum suum Dominator quem vos queritis, et Angelus testamenti, quem vos vultis.*

4. Dubium primum.—Difficultas vero est, an hæc oblatio Christi in templo etiam secundum legem Moysi facienda fuerit. Ubi non est dubium an hæc lex Christum obligaverit. Diximus enim supra, eo quod esset Deus, et absque virili semine de Spiritu Sancto conceptus, exemptum fuisse a totius legis Mosaicæ obligatione. Solum igitur potest dubitari an verba illius legis, juxta formam præcipiendi, quam præ se ferunt, in Christum convenient, quamquam eum propter alias causas non obligent. Et ratio dubii oritur ex illo verbo: *Quod aperit vulvam in filiis Israel.* Videtur enim Christus Dominus non aperuisse vulvam matris, cum natus sit integra manente ejus virginitate, et ideo ex hoc capite verba legis nullo modo vindicentur posse Christo adaptari. In contrarium vero est, quia Lucas dixit: *Tulerunt eum in Jerusalem, ut sisterent eum Domino, sicut scriptum est in lege Domini, quia omne masculinum adaperiens vulvam, sanctum Domino vocabitur.* Indicat ergo Christum fuisse ex primogenitis, qui aperiunt vulvam matris; quin

potius Chrys., Ambr., Origen., Greg. Nysenus, et alii Patres, disput. 5, sect. 2, citati, sentiunt Christum singulari modo aperuisse vulvam matris, et ideo hanc legem singuliter illum indicasse.

5. Responsio prima vera. — *Christus lege de præsentatione non comprehensus.* — Circa hoc, prætermissa illa sententia antiquorum, quæ magis mystica est et spiritualis (ut supra dixi), duplex potest esse dicendi modus. Primus est, verbum illud: *Qui aperit vulvam*, ab Spiritu Sancto additum esse propter Christum, ut verbis hujus legis nullo modo comprehendenderetur, quia aperire vulvam proprie et in rigore significat, more consueto et ordinario nasci, vias et meatus generationis perfecte aperiendo. Quomodo dixit Hormisdas Papa, ep. 1, c. 3, Christum non aperuisse vulvam matris; et hanc expositionem videtur indicare Beda, Luc. 2, licet subobscuræ; et Cyrillus Hieros., hom. de Occursu Dom., dicens: *Samuel quidem, et Isaac, et simul etiam Jacob, et Joseph, et alii multi, qui preter spem nati sunt ex sterilibus, et aperuerunt infertiles vulvas matrum, Sancti Domino vocati sunt; Christus autem solus ex solo unigenitus, cum virginales portas non aperuisset, non est Sanctus Domino, sed Sanctus sanctorum, et Dominus dominorum, et Deus deorum, et primogenitus primogenitorum, Rex regnantium, et vocabitur, et credetur, et nunc in templo a Simeone prædicabitur.* Et hæc sententia est probabilis, quia verba legis in proprietate sermonis intelligenda sunt. Item, quia ex vi illius verbi filius masculus, qui post feminam nasceretur, quamvis inter masculos esset primus, non comprehendebatur hac lege, nec erat offerendus in templo, quia non aperiebat vulvam matris, sed inveniebat aperitam ex priori partu feminæ, ut Cajet., Lipponanus, et Oleaster, et alii exposuerunt; ergo, majori ratione, Christus, licet fuerit primogenitus, cum non aperuerit vulvam matris, nullo modo fuit verbis legis comprehensus. Neque huic expositioni obstant verba Lucæ. Solum enim significare voluit Christum fuisse oblatum in templo, ut in eo servaretur, quod de primogenitis aperientibus vulvam in lege statutum erat, non quia hæc verba ad ipsum pertinerent, sed quia cum revera esset primogenitus, et mysterium nativitatis ejus ignoraretur, decuit illam legem in eo observari.

6. Responsio secunda probabilis. — Alter dicendi modus esse potest, ut verbum illud: *Qui aperit vulvam*, non in ea proprietate et

quasi materiali significatione sumatur, videbitur, ut necessarium fuerit ad obligationem illius præcepti apertione vulvæ fieri ex filii nativitate; sed ut nihil aliud sit aperire vulvam quam primo exire per vulvam. Quanquam enim ab illo effectu, qui naturaliter fieri solet a filiis qui primo exeunt ab utero matris, eo nomine appellantur primogeniti, tamen id, ad quod significandum translata videtur illa vox, solum est ipse filius, qui absolute est primogenitus, seu qui primo exit ex utero, sive materialiter rumpat claustrum matris, sive non. Et juxta hanc exponendi rationem Christus erit primogenitus adaperiens vulvam, et ita verbis quidem legis comprehendetur, quamvis lege non obligetur. Et hunc dicendi modum indicat Rupertus, l. 2 de Trin. et oper. ejus, in Exod., c. 24; et Abulensis., c. 13 Exodi, in princ.; et eum secutus est Jansen., c. 10 Concor. Et est probabilis; prior tamen, sicut simplicior, ita et altior, et proprietati litteræ magis consentaneus videtur.

7. Dubium secundum. — Tertio, principalius circa posteriorem legem observandum est, ambiguum esse verbum illud, *pro peccato;* simpliciter enim ponitur, et non explicatur ad matrem vel ad filium referendum sit. Unde consequenter manet ambiguum, an hæc lex, saltem quantum ad sacrificium offrendum pro peccato, filium vel matrem respiciat, id est, an posita sit propter aliquam matris, vel potius propter filii sanctificationem. In qua re duplex etiam potest esse dicendi modus. Primus, verbum illud referendum esse ad matrem, pro cuius peccato hoc sacrificium offerebatur, atque ita legem hanc nullo modo ad Christum pertinuisse; sed ad Virginis purificationem, de qua in sequenti sectione dicendum est. Hujus sententiae est Lyr., Levit. 12, quam ibidem secutus est Abulensis, q. 23 et 30; et Cajet. ibi; et Jansen., c. 10 Concor. Et potest fundari primo in sequentibus verbis: *Et tradet sacerdoti, qui offeret illam coram Domino, et orabit pro ea;* quæ verba non obscure indicare videntur feminam esse, pro qua sacerdos offerebat hoc sacrificium, sicut pro ea orabat, ut mundaretur. Secundo, quia (ut ait Cajetanus) regulare est ut offerens pro peccato intelligatur offerre pro peccato suo. Tertio, quia filius non habebat peccatum pro quo offerretur; origine enim jam supponebatur per circumcisio nem deletum, vel in feminis, per aliud remedium illis accommodatum. Quod si ab iis au-

toribus inquiras quod sit hoc peccatum feminæ, pro quo hoc sacrificium offerebatur, Abulensis et Cajetanus respondent nullum in particulari, sed in communi pro peccatis a quibus nemo est immunis. Sed hoc duriusculum est; nam hæc specialia sacrificia semper ad speciale maculam delendam instituebantur. Lyranus respondet offerri pro peccato libidinis, quod in coitu, quantumvis licito, regulariter admiscetur, saltem secundum aliquam veniale inordinationem. Sed, neque hoc placet, tum quia hoc peccatum non necessario neque semper committitur; tum etiam quia eadem ratione instituendum esset sacrificium pro simili peccato viri; tum denique quia si quod est hujusmodi peccatum, non in partu, sed in conceptione committitur; prius ergo expiandum esset, nec oportuisset partum expectare. Burgensis ergo et Jansenius respondent hoc non esse peccatum aliquod, quod sit vera culpa; sed esse legale immunitiam, vel irregularitatem ex sordibus puerperii et fluxu sanguinis contractam. Sed licet hæc expositi recte explicata probabilis sit, interrogare ab his auctoribus possumus, cur non possit similiter explicari de peccato filii, id est, pro immunitate legali, et irregularitate contracta ex immunda nativitate.

8. Responsio probabilis. — Alter modus exponendi verbum illud, *pro peccato*, est ut ad prolem referatur, ita ut illud sacrificium esset propter aliquod peccatum prolis expandum; ita docuit Augustinus, lib. Quæst. in Leviticum, quæst. 40, quem hic, art. 3, D. Thom. et Cajetanus secutus est; et Glossa ordinaria, Levit. 12; et ibi Hugo Cardinalis; Rupertus, lib. 2 in Leviticum, c. 16; Beda et Euthymius, Lucæ 2; S. Eligius, hom. de Purificatione. Augustinus fundatus videtur in verbo illo Levitici: *Cumque expleti fuerint dies purificationis sue, pro filio, sive pro filia, deferet agnum anniculum, etc.* Non ignoravit tamen Augustinus posse facile responderi, verbum illud, *pro filio, sive pro filia,* non esse construendum cum sequenti verbo, *deferet agnum, etc.*, sed cum antecedenti, scilicet: *Cum expleti fuerint dies purificationis, ita ut sensus sit, cum expleti fuerint purgationis dies designati pro filio, sive pro filia, deferet agnum in holocaustum.* Cum hanc igitur expositionem, quæ plane literalis est, Augustinus videret, adjunxit verba Lucæ, c. 2: *Cum inducerent puerum Jesum parentes ejus, ut facerent secundum consuetudinem legis pro eo;*

quibus indicatur pro eo oblatum fuisse sacrificium. Sed hæc etiam verba per se sumpta non admodum cogunt, quia referri possunt non ad hanc legem, sed ad alteram supra exppositam. Induxerunt enim eum in templum, ut pro eo facerent secundum consuetudinem legis, id est, ut illum præsentarent et offerrent Deo. Sed obstat huic expositioni, quod Ecclesia, in officio Purificationis, Responso 2 et 3 primi nocturni, aliter videtur expondere, dicens: *Obtulerunt pro eo Domino parturorum, aut duos columbarum.* Quæ verba torqueri quidem possunt ad improprios sensus, ut *pro eo* dicatur oblatum sacrificium, id est, propter nativitatem ejus, seu occasione illius; tamen in rigore multum favent huic sententiae; quæ (quidquid nimis licenter dicat Jansenius) valde probabilis est, præseriat cum sit gravissimorum Patrum. Oportet tamen illam convenienter expondere; nunquam enim ii Sancti dixerunt offerri hoc sacrificium pro peccato originali prolis. Nam, licet Augustinus dicat hic indicari vitiatam originem ex Adamo, et prolem in iniquitatibus esse conceptam, propter quod D. Thomas dixit hoc sacrificium fuisse *ad expiationem peccati, in quo proles erat concepta, et nata, nihilominus non existimo locutos fuisse de peccato originali quoad culpam ejus, quam ubique docent solitam fuisse auferri per circumcisionem;* loqui ergo videntur de immunitate contracta ex vi conceptionis impuræ ac libidinosæ, et nativitatis sordidæ, et (ut ita dicam) sanguinolentæ. Nam, quia tota hæc corruptio ex infectione peccati orta est, ideo sacrificium illud dicitur esse pro peccato.

9. Responsio vera. — Quocirca, quasi tenendo medium viam inter has sententias, vel illas conciliando, probabiliter censeo illud verbum, *pro peccato*, neque ad solam matrem, neque ad solum filium, sed ad utrumque esse referendum. Quod sane videtur Augustinus indicasse his verbis: *Cur ergo non illud, quod natum est, purgari dicit Scriptura per hoc sacrificium, sed ipsam quæ peperit?* an ad ipsam quidem, unde illa origo trahebatur, relata purgatio est propter sanguinis fontem? non poterat tamen sine ipsius fætus purgatione, qui ex ipso sanguine exortus est. Et eamdem sententiam indicat Origenes, hom. 14 in Lucam. Ubi enim nos legimus: *Cum impleti essent dies purgationis ejus, ipse legit, dies purgationis eorum,* ut habent nonnulli codices Graeci, et ad utrumque, matrem, scilicet, et prolem, purgationem refert. Ad quod magis

explicandum, conferre potest doctrina quam Jansenius afferit: cum in Scriptura dicitur offerendum esse aliquod sacrificium *pro peccato*, non semper intelligi illud sacrificium offerendum esse in satisfactionem ac remissionem alicujus culpe; sed illam vocem esse compositam ad significandum quoddam genus sacrificii instituti ad quamcunque expiationem, ut ex Levit. 14 et 15, et ex aliis locis constat. In hac ergo lege præcipiebatur feminæ, ut tam pro se quam pro filio offerret holocaustum in gratiarum actionem, et sacrificium pro peccato, ad suam purgationem et satisfactionem filii, qui speciali modo tunc Deo dicabatur. Nam, licet per circumcisionem masculi sanctificarentur, tamen neque illa cæremonia fuerat peculiariter in lege Moysi instituta, sed antiquior, nec erat generalis omni proli, et habuit aliam propriam ac specialem rationem institutionis, et ideo conveniens fuit ut per speciale legis sacrificium statim filii sanctificarentur legali sanctificatione, ac Deo consecrarentur, vel certe ut magis ac magis mundarentur ac liberarentur a reliquiis originaliis peccati, ut Hugo Card. adnotavit, et indicavit Euthymius supra, dicens: *Jussit lex ut darent par turturum, propter pueri temperantiam. Est enim turtur animal castissimum; aut duos pullos columbarum, propter ejus secunditatem.* Ex quibus omnibus intelligere licet, hanc legem observatam esse a Virgine, non solum propter se, sed etiam propter filium. Itaque non solum mater, sed etiam filius huic legi se subjecit; quanquam multis nominibus ab illa esset liber, et specialiter quia nulla indigebat sanctificatione, nec propria, nec legali. Potuit tamen holocaustum, quod erat in gratiarum actionem, proprie pro illo offerri; sacrificium autem pro peccato non ita proprie, si secundum specialem rationem et intentionem suam consideretur. Nam, quatenus omne sacrificium continet cultum Dei, et potest in gratiarum actionem offerri, sic poterat etiam tale sacrificium pro Christo offerri; imo ab ipsomet offerbatur, etiam in satisfactionem pro totius naturæ peccato.

10. *Turturum Virgo cur obtulerit, et non agnum.*—Quarto et ultimo observandum est, in lege præcepit esse ut in hoc holocausto agnus offerretur; pauperibus tamen fuisse permisum ut loco agni offerrent unum pullum columbae, seu turturum in holocaustum; alterum vero pro peccato. Lucas ergo Evangelista, ut denotaret parentes Christi obtulisse

se sacrificium pauperum, nulla agni mentione facta, inquit: *Ut darent hostiam, secundum quod scriptum est in lege Moysi, par turturum, aut duos pullos columbarum.* Est autem observatione dignum, cur Evangelista non definite, sed sub disjunctione eorum oblationem retulerit; lex enim sub disjunctione fuit lata, quia voluit hoc offerentium voluntati relinquere; tamen in effectu non servabatur, nisi definite alterum eorum offerendo; cum ergo Lucas non legislatoris, sed historiographi munus exerceat, cur non definite retulit quid Virgo obtulerit? Revera nulla alia est ratio, nisi quia solum voluit significare Virginis paupertatem, quod nobis esse poterat utile. Nam quod obtulerit turturum aut pullum columbae, nihil ad nostram institutionem referebat. Addit vero Abulens., Levit. 13, q. 29, B. Virginem non propter paupertatem quam revera patetur, id est, quia esset impotens ad offerendum agnum, sed propter paupertatem, id est, ut affectum paupertatis demonstraret, et ut filium, quem offerebat, paupertatis amatorem esse significaret, ideo non agnum, sed turturum obtulisse. Et addunt aliqui mysterium aliud, scilicet, quia cum verum agnum offerret, non oportebat figurativum agnum offerre. Confirmat autem Abulensis suam sententiam, quia B. Virgo habuit quinque siclos quibus Christum redimeret; ergo etiam potuisse agnum emere, si voluisset. Præterea confirmatur, quia paucis ante diebus dono accepta Magis aurum, et alia que erant sufficientis valoris ad emendum agnum.

11. Sed hæc conjecturæ, et mysticæ rationes ita sunt accipiendæ, ut litteralis sensus non corrumptatur. Certum est itaque B. Mariam implevisse legem vere ac proprie, ac si ea obligaretur; verba autem legis erant: *Quod si non invenerit manus ejus, nec potuerit offerre agnum, sumet duos turtures, etc.*; oportet ergo ut hæc verba ad litteram verantur in Virgine; alioquin non observasset legem. Verba autem illa moraliter intelligenda sunt, si non posset commode et juxta statum suum, et hoc sensu fatendum est Virginem non potuisse; habebat enim tenuem substantiam, et extra patriam multis diebus peregrinabatur; et ideo licet absolute posset, non tamen moraliter juxta statum suum, et ideo non tenebatur in rigore offerre agnum, etiam si alias fingamus legi obligari. Hoc autem posito, sunt optimæ due rationes adductæ, ob quas elegit potius offerre pauperum oblationem, quam divitum. Tum etiam pro-

pter humilitatem, quia libenter se pauperem ostendebat ac profitebatur. Conjectura autem illa de quinque siclis non cogit, nam potius, quia oportuit expendere quinque siclos in redemptionem filii, prout absolute et sine ulla remissione in lege statuebatur, ideo non erat ei tanta facultas, ut simul posset commode agnum offerre. Ad alteram vero conjecturam de oblatione facta a Magis dicitur, vel dona Magorum non fuisse magni valoris et quantitatis, vel magna ex parte Virginem et Joseph aliis pauperibus ex eis subvenisse. Ac denique (quidquid de hoc sit) non mutavit statum Virginis, ac pauperem conditionem, quod eo tempore aliquam majorem pecuniam copiam haberet; poterat enim prudenter eam in futuros usus reservare.

12. *Origenis sententia singularis.*—Non prætermittam, in fine hujus sectionis, advertere singularem quamdam sententiam Origenis, ne fortasse aliquis in eam offendat. Ille enim de hac Virginis oblatione sermonem habens, hom. 14 in Luc., sic inquit: *Turturum par, et duos pullos columbarum pro Salvatore videmus oblato; ego et aves istas beatas puto, que pro ortu Domini oblatae sunt. Et quomodo asinam Balaam miror, et felicitate accumulo, quia digna fuerit non solum videre Angelum Dei, sed etiam ore reserato in humanum sermonem erumpere, sic multo amplius has volucres prædicto, easque sustollo, quod pro Domino nostro et Salvatore oblatae sunt: Ut offerrent pro eo par turturum, aut duos pullos columbarum. Novum quid forsitan videar inferre: sed pro maiestate rei parum dignum. Sicut nova fuit generatio Salvatoris, non ex viro et muliere, sed ex sola tantum Virgine, sic et par turturum, et duo pulli columbarum non fuerunt tales quales oculis carnis aspicimus, sed qualis Spiritus Sanctus in specie columbae descendit, et venit super Salvatorem, quando in Jordane baptizatus, tale fuit et par turturum. Non erant volucres istæ, ut istæ que per aërem volitant, sed divinum quiddam, et humana contemplatione augustius, sub specie columbae et turturis apparebat, ut non talibus victimis, qualibus omnes homines, ille, qui pro toto mundo nascebatur, et pati habebat, coram Domino mundaretur; sed ut dispensatio ejus nova omnia, ita etiam novas haberet hostias secundum voluntatem omnipotentis Dei.* Hæc fortasse ab Origene dicta fuerunt in aliquo sensu metaphorico, ad innuendum hoc sacrificium, quatenus a Virgine et pro Christo oblatum est, singularem habuisse ex-

cellentiam, ac speciali Spiritus Sancti providentia fuisse ordinatum; alioquin tamen de fide certum est, aves illas fuisse veras, quales ab aliis offerri solebant. Hoc enim veritas et proprietas Scripturæ requirit, et Origenes in hac parte suspectus est; facile enim, literali sensu Scripturæ relictio, ad metaphoricum divertit.

SECTIO II.

Utrum ex necessitate vel obligatione legis B. Virgo ad templum purganda venerit.

1. Non est quod in controversiam vertamus an B. Virgo sancte ac convenienter egredit, legem purificationis observans. Quoniam (ut eleganter Bernardus dixit, ser. 3 de Purificat.) non est dissimilis ratio purificationis matris, et filii circumcisionis. Sicut enim decuit ut filius, etiamsi impurus ac peccator eset existimandus, legem servaret, ut humiliatatem ac obedientiam profiteretur, omnemque scandali occasionem vitaret, ita ob easdem causas oportuit Virginem purificari: *Esto itaque (inquit Bernard.) o Beata Virgo, inter mulieres tanquam una earum, nam et filius tuus sic est in numero puerorum.*

2. *Macula in Virgine nulla Purificationis indiga.*—Cum ergo constet hoc fuisse convenientis, querimus an etiam fuerit necessarium. In qua quæstione due includuntur: prima, an causa seu ratio hujus legis in B. Virgine inventa fuerit, ut propterea censenda sit sub lege comprehensa; altera est, an verba legis ad ipsam pertineant; solent enim leges obligare, etiamsi ratio eorum in particuliari cesseret. Priorem quæstionem late tractat Abulens., Levit. 12, q. 2 et sequenti, et opinatur rationem, propter quam lex illa introducta est, in B. Virgine inventam fuisse. Nam illa lex lata fuit propter immunditiam corporalem parturientium ex fluxu sanguinis provenientem, ut patet ex illis verbis: *Orabit pro ea sacerdos, et sic mundabitur a profluvio sanguinis sui.* Sed, licet B. Virgo in suo partu mundior fuit etiam feminis, non tamen omnino caruit fluxu sanguinis; ergo ratio legis in ea viguit. Sed hæc ipsam ratio oppositam sententiam veram esse demonstrat; ostendimus enim supra, disput. 13, sect. 2, partum Virginis fuisse purissimum, omnisque sordis immunem, et a fluxu sanguinis liberum. Quam esse communem Patrum sententiam, et rationi valde consentaneam, ostendi supra, cit. loco. Unde eleganter Bernardus,

dicto sermone: *Nihil in hoc conceptu, nihil in partu impurum fuit, nihil illicitum, nihil purgandum. Nimis cum proles ista fons virutatis sit, et purgationem venerit facere delictorum, quid in me legalis purificet observatio, quæ purissima facta sum ipso partu immaculata?* Et Eusebius Emis., ser. de Purific.: *Quamvis, inquit, purgationis dies ad B. Mariam Virginem non pertinerent, expectarit tamen ipsa donec omnes purgationis dies completerentur, quos non sibi, sed aliis mulieribus lex constituerat. Non enim de ea dictum fuerat: Omne sanctum non tangat, quæ ipsum sanctum sanctorum in gremio tenebat, in sinu forebat, et virgineo lacte nutriebat.* Et S. Eligius: *Nequaquam immunda judicatur, quæ Sancto Spiritu obumbrante, totius munditiæ et sanctitatis auctorem genuisse probatur; et similia habet Anselmus in hoc Lucæ Evang. Sed omnium gravissime Cyrus Alex., l. 2 de Fide ad Reg., parum a principio, ubi ex sua, et cuiusdam antiqui Episcopi, cuius nomen non refert, sententia, hæc profert verba: Quod si is, qui Deus secundum naturam est, utpote unigenitus Dei Filius, servili forma indutus, sacræque Virginis primogenitus appellari non deditus, semetipsum redemptionem pro omnibus tradidit, clare patet in quantam impietatem prolabantur Ariani, qui Deiparam Mariam iis sacrificiis, quæ pro puerperis ex lege offerri mos erat, opus habuisse asserunt. Sit igitur constans ac certum, B. Virginem nullam habuisse maculam, propter quam purificatione indigeret.*

3. *Virgo lege de purificatione lata non fuit comprehensa.* — Reliquum est explicemus an verbis legis fuerit comprehensa. Fuit enim fere omnium Patrum, qui hanc legem explicarunt, concors sententia, non absque mysterio et singulari Spiritus Sancti providentia additum esse in ea verbum illud: *Mulier, si suscepto semine peperit masculum;* ut indicaretur hac lege non esse comprehensam illam mulierem, quæ absque suscepto semine masculum pareret. Ita ponderavit Origenes, hom. 8 in Levit.; Rupertus, l. 2 in Levit., c. 16; Eusebius Emissenus, S. Eligius, Bernardus, et Laurentius Justin., in citatis concionibus de Purificatione; et Theophylactus, Lucæ 2: *Bene, inquit, dixit secundum legem Moysi, nam secundum veritatem nulla necessitate adstringebatur; dictum enim est in lege: Mulier, qui suscepto semine conceperit,* etc. Similia fere verba habent Euthymius, et Beda ibi, quos secutus est Cajetanus ibi. At vero Abulensis,

in c. 12 Levit., q. 2, hanc sententiam rejicit conjecturis quibusdam et rationibus parum urgentibus. Summa earum est, quia sine causa legislator intenderet illo verbo excipere B. Virginem, cum illa exceptio nullius futura esset utilitatis, quia nec B. Virgo illa usura erat, nec aliis constare poterat eam absque semine concepisse. Hanc vero sententiam amplexi sunt moderni expositores, qui hebraicarum litterarum peritiores sibi videntur. Oleaster, in Levit.; Jansenius, c. 10 Concordie, et inclinat etiam Cajetanus, super Leviticum. Me autem conjectura Abulensis nihil movet; valde enim utile esse potuit, quod admiranda Virginis conceptio tanto antea tempore fuerit a Moyse propheticæ indicata. Quod vero ad phrasim hebraicam pertinet, licet fortasse verum sit, *semen*, sâpe non significare principium generationis, sed prolem ipsam, et ideo, *facere semen*, idem esse quod *generare*, tamen, si consideremus nullum verbum esse in Scriptura sine mysterio, et legislatorem utrumque verbum posuisse, verisimile est non sine causa id fecisse; sed ad indicandum aliquod mysterium, presertim cum Septuaginta interpres non vertant: *Mulier, qui fecerit, sed, quæ suscepit semen,* quod proprie ad principium generationis refertur. Et Hieronymus, hanc refinens interpretationem, ita sentire visus est. Nec factum existimo absque speciali Dei providentia, quod vulgata editio tam aperte hoc mysterium indicaverit, quodque tot annis in Ecclesia fuerit receptum; non igitur est a viris catholicis ac piis tam facile contemendum. Addo, quamvis phrasis illa hebraica idem significet, quod *prolem concipere vel emittere*, vel (ut alii ad rem explicandam dicunt) idem sit quod *seminalicere*, nihilominus, si verbi et locutionis vim et etymologiam consideremus, proprie significare, prolem emittere ex concepto semine; ergo quacunque ratione exponatur, est locus prædicto mysterio. Denique omnes fatentur B. Virginem non fuisse obligatam hac lege, ut videre licet in citatis Patribus, et in Chrysostomo, hom. de Occursu Domini; solus enim Abulensis hoc in dubium revocare ausus est, dicens obligatam quidem fuisse ex vi verborum legis; an vero re ipsa fuerit obligata, vel alia via aut ratione fuerit exempta, incertum esse, et ex divino arbitrio et dispensatione pendere. Jansenius autem, videns hoc adversari communi sensui Ecclesiæ et Sanctorum, prudentius quidem, fortasse tamen minus consequenter dixit, licet verba

legis Virginem comprehendere possent ac ligare, nihilominus tamen illam non obligasse, tum quia in ea cessavit ratio legis, non solum quia sordibus puerperii caruit, sed etiam quia ipsum auctorem sanctitatis et munditiae peperit; tum etiam quia peperit Deum, qui supra omnem legem erat. Hæ tamen rationes (si recte expendantur), non sufficiant ut B. Virgo non obligaretur lege, si verbis legis comprehenderetur. Nam cessante fine legis in particulari, non cessat obligatio legis; et quod filius fuerit omni lege superior, quia Deus erat, non ostendit idem esse matri attribuendum, alioqui totius veteris legis obligatione Virgo libera fuisset, quod nulla ratione nititur. Ut ergo firmo ac constanti fundamento dicamus B. Virginem non fuisse hac lege obligatam, asseramus necesse est verbis legis non fuisse comprehensam.

4. *Mos benedicendi et accendendi cæreos in die Purificationis unde ortus.* — Cætera quæ de hoc mysterio desiderari possunt, legantur in homiliis Sanctorum Patrum, et in expositoriis Evangeliorum, et specialiter de revelatione facta Simeoni et Anne nonnulla tetigimus supra, disp. 14, sect. 1, ubi Sanctos Patres, qui de hac re scripserunt, indicavimus, presertim Chrysostomum, Gregorium Nysseum, Cyrrillum Hierosol., ex quibus colligere licet quam sit antiqua in Ecclesia hujus mysterii celebratio ac festivitas, et unde duxerit originem cæremonia benedicendi ac accendendi cæreos in hac festivitate, quæ tempore etiam Cyrrilli Hierosol. erat in usu: *Læti, inquit, hodie lampades ornemus, jamque filii lucis veræ luci Christo offeramus. Quoniam lumen ad revelationem gentium mundo apparuit, ideo lumina ex lumine resplendeamus.* Legatur Albinus Flaccus, lib. de Divinis officiis, cap. de Purific., ubi dicit Ecclesiam, inter alias causas, introduxisse hanc cæremoniam ad mutandam lustrandi consuetudinem quam Gentes observabant, dicentes hunc mensem Deo Februario, ut Augustinus etiam retulit, lib. 7 de Civit., c. 7; et eamdem rationem habet Beda, in lib. de Ratione temp.; et latius Innocentius III, serm. de Purific.; et plures alias rationes affert Eligius, dicta hom. 2 de eadem festivitate.

5. *Lex vetus de purificatione puerperæ jam cessavit.* — Ultimo observari hoc loco potest, legem hanc de purificatione, sicut alias cæremoniales omnes veteris legis, jam cessasse; permisum tamen esse ab Ecclesia, ut si feminæ velint post partum abstinere aliquan-

DISPUTATIO XVII,

In tres sectiones distributa.

DE RELIQUIS MYSTERIIS VITÆ CHRISTI USQUE AD ANNUM ETATIS EJUS TRIGESIMUM.

Explicato purificationis mysterio, ac reliquo tempore vitæ Christi prætermisso, disputationem de baptismo ejus statim aggreditur D. Thomas; nos vero, priusquam ad illius mysterii explicationem accedamus, duo præstanta duximus. Primum enim, ut historiæ seriæ melius texendo, nihil, quoad fieri potest, intactum relinquamus, de Salvatoris infantia, deque reliquo vitæ tempore ab Evangelistis prætermisso pauca dicemus. Deinde, quoniam reliqua mysteria vitæ Christi minus conjuncta sunt cum disputatione de B. Virgine, absolvemus omnia quæ ad illius excellentiam et dignitatem spectare videbuntur. Quibus finitis, reliqua vitæ Christi mysteria, et ceterarum quæstionum D. Thomæ explicationem persecuemur.

SECTIO I.

Cur Christus in Ægyptum fugere voluerit.

1. *Quo tempore Christus in Ægyptum secesserit.* — *Obiectio.* — *Responsio.* — Matthæus Evangelista, c. 2, post narratam trium Magorum historiam, statim subjungit: *Qui cum recessissent, ecce Angelus Domini apparuit in somnis Joseph, dicens: Surge, et accipe puerum et matrem ejus, et fuge in Ægyptum, et esto ibi usque dum dicam tibi. Futurum est*